

藏

書

藏書賊臣傳卷五十

○殘賊五

○甯成等

太史公曰孔子曰導之以政齊之以刑民免而無耻導之以德齊之以禮有耻且格老氏稱上德不德是以有德下德不失德是以無德法令滋章盜賊多有信哉是言也法令者治之具而非制治清濁之源也昔天下之罔嘗密矣然姦軌愈起其極也上下相遁至於不振當是之時吏治若救火揚沸非武健嚴酷

惡能勝其任而愉快乎言道德者溺其職矣故曰聽
訟吾猶人也必也使無訟乎下士聞道大笑之非虛
言也漢興破觚而爲圓斲珣而爲樸號爲罔漏吞舟
之魚而吏治蒸蒸不至於姦黎民乂安由是觀之在
彼不在此高后時酷吏獨有侯封刻轢宗室侵辱功
臣呂氏已敗遂夷侯封之家寧成南陽穰人也以郎
謁者事景帝好氣爲小吏必陵其長吏爲人上操下
急如束溼猾賊任威稍遷至濟南都尉而到都爲守
始前數都尉皆步入府因吏謁守如縣令其畏都如

此及成往直凌都出其上都素聞其聲於是善遇與
結驩久之都死後長安左右宗室多犯法上乃召成
爲中尉其治效到都其廉弗如然宗室豪傑皆人人
惴恐武帝卽位徙爲內史外戚多毀成之短抵罪髡
鉗是時九卿罪死卽死少被刑而成極刑自以爲不
復收廼解脫詐刻傳出關歸家稱曰仕不至二千石
賈不至千萬安可比人乎廼貰貧陂田千餘頃假貧
民役使數千家數年會赦致產數千萬爲任俠持吏
長短出從數十騎其使民威重於郡守周陽由其父

趙兼以淮南王舅侯周陽故因氏焉由以宗家任爲
郎事文帝景帝時由爲郡守武帝卽位吏治尚修謹
然由居二千石中最爲暴酷驕恣所愛者撓法活之
所憎者曲法滅之所居郡必夷其豪爲守視都尉如
令爲都尉陵太守奪之治汲黯爲校司馬安之文惡
俱在二千石列同車未嘗敢均茵馮後由爲河東都
尉與其守勝屠公爭權相害勝屠公當抵罪議不
受刑自殺而由棄市自甯成周陽由之後事益多民
巧法大抵吏治類多成由等矣義縱河東人也少年

時嘗與張次公俱攻剽爲羣盜縱有姊以醫幸王太后太后問有子兄弟爲官者乎姊曰有弟無行不可太后廼告上上拜義姁弟縱爲中郎補上黨郡中令治敢往少溫籍縣無逋事舉第一遷爲長陵及長安令直法行泊不避貴戚以捕按太后外孫修成君子仲上以爲能遷爲河內都尉至則族滅其豪穰氏之屬河內道不拾遺而張次公亦爲郎以勇悍從軍敢深入有功封爲岸頭侯寗成家居上欲以爲郡守御史大夫弘曰臣居山東爲小吏時寗成爲濟南都尉

其治如狼牧羊成不可令治民上廼拜成爲關都尉
歲餘關吏稅肄郡國出入關者號曰寧見乳虎無值
寧成之怒其暴如此義縱自河內遷爲南陽太守聞
寧成家居南陽及至關寧成側行送迎縱氣盛弗爲
禮至郡遂按寧氏破碎其家成坐有罪及孔暴之屬
皆奔亡南陽吏民重足一迹而平氏朱彊杜衍杜周
爲縱爪牙之吏任用遷爲廷尉史軍數出定襄定襄
吏民亂敗於是徙縱爲定襄太守縱至掩定襄獄中
重非輕繫二百餘人及賓客昆弟私入相視者亦二

百餘人縱壹切捕鞠曰爲死罪解脫是日報殺四百餘人郡中不寒而栗猾民佐吏爲治是時趙禹張湯爲九卿矣然其治尚寬輔法而行縱以鷹擊毛摯爲治後會更五銖錢白金起民爲姦京師尤甚廼以縱爲右內史王溫舒爲中尉溫舒至惡所爲弗先言縱縱必以氣陵之敗壞其功其治所誅殺甚多然取爲小治姦益不勝直指始出矣吏之治以斬殺縛束爲務閭閻奉以惡用矣縱廉其治效到都上幸鼎湖病久已而卒起幸甘泉道不治上怒曰縱以我爲不復行

此道乎銜之。至冬，楊可方受告緡縱，以爲此亂民部吏捕其爲可使者。天子聞，使杜式治，以爲廢格沮事，棄縱市。後一歲，張湯亦死。王溫舒，陽陵人也。少時椎埋爲姦，已而試縣亭長，數廢數爲吏，以治獄至廷尉。史事張湯，遷爲御史督盜賊，殺傷甚多，稍遷至廣平都尉。擇郡中豪敢往吏十餘人爲爪牙，皆把其陰重罪，而縱使督盜賊，快其意，所欲得此人，雖有百罪弗法，卽有避回夷之，亦滅宗。以故齊趙之郊盜不敢近。廣平、廣平聲爲道不拾遺。上聞，遷爲河內太守，素居

廣平時皆知河內豪姦之家及往以九月至今郡具
私馬五十疋爲驛自河內至長安部吏如居廣平時
方略捕郡中豪猾相連坐千餘家上書請大者至族
小者乃死家盡沒入償減奏行不過二日得可事論
報至流血十餘里河內皆怪其奏以爲神速盡十二
月郡中無聲毋敢夜行野無犬吠之盜其頗不得失
之旁郡追來會春溫舒頓足嘆曰嗟乎今冬月益展
一月足吾事矣其好殺行威不愛人如此上聞之以
爲能遷爲中尉其治復放河內徙諸名禍猾吏與從

事河內則揚皆麻戊關中揚贛成信等義縱爲內史
憚之未敢恣治及縱死張湯敗後徙爲廷尉而尹齊
爲中尉坐法抵罪溫舒復爲中尉爲人少文居它
昏不辯至於中尉則心開素習關中俗知豪惡吏豪
惡吏盡復爲用吏苛察淫惡少年投鉅購告言姦置
伯落長以收司姦溫舒多諂善事有執者卽無執視
之如奴有執家雖有姦如山弗犯無執雖貴戚必侵
辱舞文巧詆下戶之猾以動大豪其治中尉如此姦
猾窮治大抵盡糜爛獄中行論無出者其爪牙吏虎

而冠於是中尉部中中丞以下皆伏有執者爲遊聲譽稱治數歲其吏多以堪貴富溫舒擊東越還議有不中意坐法免是時上亡欲作通天臺而未有人溫舒請覆中尉脫卒得數萬人作上說拜爲少府徙右內史治如其故姦邪少禁坐法失官復爲右輔行中尉如故操歲餘會廷軍發詔徵豪吏溫舒匿其吏華成及人有變告溫舒受員騎錢它姦利事罪至族自殺其時兩弟及兩婚家亦各自坐它罪而族光祿勳徐自爲曰悲夫夫古有三族而王溫舒罪至同時而

五族乎。溫舒死家直索千金。後數歲尹齊亦以淮陽都尉死。家直不滿五十金。尹齊東郡茌平人也。以刀筆吏稍遷至御史。事張湯。湯數稱以爲廉。武帝使督盜賊。斬伐不避貴執。遷關都尉。聲甚於甯成。上以爲能。拜爲中尉。吏民益彫敝。尹齊木強少文。豪惡吏伏匿而善吏不能爲治。以故事多廢。抵罪後復爲淮陽都尉。所誅滅淮陽甚多。及死仇家欲燒其尸。妻亡去。歸葬楊僕。宜陽人也。以千夫爲吏。河南守舉爲御史。使督盜賊。關東治放。尹齊以敢擊行。稍遷至主爵都

尉上以爲能。南越反，拜爲樓船將軍。有功，封將梁侯。東越反，上欲復使將，爲其伐前勞，以書敕責之曰：「將軍之功，獨有先破石門，尋陁，非有斬將，奪旗之實也。鳥足以驕人哉！前破番禺，捕降者，以爲虜，掘死人，以爲獲，是一過也。建德呂嘉逆罪，不容於天下，將軍擁精兵，不窮追超然，以東越爲援，是二過也。士卒暴露連歲，爲朝會，不置酒，將軍不念其勤勞，而造佞巧，請乘傳行塞，因用歸家，懷銀黃，垂三組，夸鄉里，是三過也。失期內顧，以道惡爲解，失尊尊之序，是四過也。欲

請蜀乃問君賈幾何對曰率數百武庫日出兵而陽不知挾僞干君是五過也受詔不至蘭池宮明日又不對假令將軍之吏問之不對令之不從其罪何如推此心以在外江海之間可得信乎今東越深入將軍能率衆以掩過不僕惶恐對曰願盡死贖罪與王溫舒俱破東越後復與左將軍荀彘俱擊朝鮮爲彘所縛還免爲庶人病死減宣楊人也以佐史給事河東守衛將軍青使買馬河東見宣無害言上徵爲廐丞官事辦稍遷至御史及丞使治主父愾及淮南反

獄所以微文深詆殺者甚衆稱爲敢決疑數廢數起
爲御史及中丞者幾二十歲王溫舒爲中尉而宣爲
左內史其治米鹽事小大皆關其手自部署縣名曹
寶物官吏令丞弗得擅搖痛以重法繩之居官數年
壹切爲小治辯然獨宣以小至大能自行之難以爲
經中廢爲右扶風坐怒其吏成信信亡藏上林中宣
使郿令將吏卒闖入上林中蠶室門攻亭格殺信射
中苑門宣下吏爲大逆當族自殺而杜周任用杜周
南陽杜衍人也義縱爲南陽太守以周爲爪牙薦之

張湯爲廷尉史使案邊失亡所論殺甚多奏事中意
任用與臧宣更爲中丞者十餘歲周少言重遲而內
深次骨宣爲左內史周爲廷尉其治大抵放張湯而
善候司上所欲擠者因而陷之上所欲釋久繫待問
而微見其寃狀客有謂周曰君爲天下決平不循三
尺法專以人主意指爲獄獄者固如是乎周曰三尺
安出哉前主所是著爲律後主所是疏爲令當時爲
是何古之法乎至周爲廷尉詔獄亦益多矣二千石
繫者新故相因不減百餘人郡吏太府舉之廷尉一

歲至千餘章。章大者連逮證案數百。小者數十人。遠者數千里。近者數百里。會獄吏因責如章。告劾不服。以掠笞定之。於是聞有逮證。皆亡匿。獄久者至更數赦。十餘歲而相告言。大氏盡詆以不道。以上廷尉及中都官詔獄。逮至六七萬人。吏所增加十有餘萬。周中廢後爲執金吾。逐捕桑弘羊衛皇后昆弟子。刻深上以爲盡力無私。遷爲御史大夫。始周爲廷史。有一馬且不全。及久任事。列三公而兩子夾河爲郡守。家訾累巨萬矣。治皆酷暴。唯少子延年行寬厚云。是時

郡守尉諸侯相二千石欲爲治者大抵盡效王溫舒等而吏民益輕犯法盜賊滋起南陽有梅免百政楚有段中杜少齊有徐勃燕趙之間有堅盧范主之屬大羣至數千人擅自號攻城邑取庫兵釋死罪縛辱郡守都尉殺二千石爲檄告縣趣具食小羣以百數於是上始使御史中丞丞相長史督之猶弗能禁乃使光祿大夫范昆諸部都尉及故九卿張德等衣繡衣持節虎符發兵以興擊斬首大部或至萬餘級及以法誅通行飲食坐相連郡甚者數千人數歲廼頗

得其渠率散卒失亡復聚黨阻山川往往而羣無可奈何於是作沈命法曰羣盜起不發覺發覺而捕弗滿品者二千石以下至小吏主者皆死其後小吏畏誅雖有盜弗敢發恐不能得坐課累府府亦使不言故盜賊寔多上下相爲匿以避文法焉

○趙禹張湯

趙禹者潁人以佐史補中都官用廉爲令史事太尉亞夫亞夫爲丞相禹爲丞相史府中皆稱其廉平然亞夫弗任曰極知禹無害然文深不可以居大府今

上時禹以刀筆吏積勞稍遷爲御史上以爲能至太
中大夫與張湯論定諸律令作見知吏傳得相監司
用法益刻蓋自此始張湯杜人也父爲長安丞出湯
爲兒守舍還而鼠盜肉父怒笞湯湯掘熏得鼠及餘
肉劾鼠掠治傳爰書訊鞠論報并取鼠與肉具獄磔
堂下父見之視其文辭如老獄吏大驚遂使書獄父
死湯給事內史爲甯成掾丞相武安侯徵湯爲吏薦
補侍御史治陳皇后蠱獄深竟黨與上以爲能遷太
中大夫與趙禹共定諸律令務在深文拘守職之吏

已而禹至少府湯爲廷尉兩人交驩兄事禹禹爲人
廉倨爲吏以來舍母食客公卿相造請禹禹終不報
謝務在絕知友賓客之請孤立行一意而已見文法
輒取亦不覆案湯爲人多詐舞智以御人已心內雖
不合然陽浮慕之奏讞疑事必豫爲上分別其原上
所是受而著讞法廷尉挈令楊主之明奏事卽譴湯
摧謝鄉上意所便必引正監掾史賢者曰固爲臣議
如上責臣臣弗用愚抵於此罪常釋聞明奏事上善
之曰臣非知爲此奏乃正監掾史某爲之所治卽上

意所欲罪予監史深禍者卽上意所欲釋與監史輕
平者所治卽豪必舞文巧詆卽下戶羸弱時口言雖
文致法上財察於是往往釋湯所言湯至於大吏內
行修也通賓客飲食於故人子弟爲吏及貧昆弟調
護之尤厚其造請諸公不避寒暑是以湯雖文深意
忌不專平然得此聲譽而深刻吏多爲爪牙用者其
治淮南衡山江都反獄皆窮根本嚴助伍被上欲釋
之湯爭不可繇是益專任遷御史大夫會渾邪等降
漢大興兵伐匈奴山東水旱貧民流徙皆卽給縣官

縣官空虛湯承上指請造白金及五銖錢籠天下鹽鐵排富商大賈出告緡令鉏豪彊并兼之家舞文巧詆以輔法湯每朝奏事語國家用日理主盱天子忘食丞相取充位天下事皆決於湯百姓不安其生騷動縣官所興未獲其利姦吏並浸漁於是痛繩以臯則自公卿以下至于庶人咸指湯湯嘗病上自至舍視其隆貴如此匈奴求和親羣臣議前博士狄山曰和親便湯曰此愚儒無知狄山曰臣固愚忠若御史大夫湯乃詐忠湯之治淮南江都以深文痛詆諸侯別疏

骨肉使藩臣不自安臣固知湯之爲詐忠於是上作
色曰吾使生居一郡能無使虜入盜乎山曰不能曰
居一縣曰不能復曰居一鄣間山自度辯窮且下吏
曰能廼遣山乘鄣至月餘匈奴斬山頭而去是後羣
臣震懼湯客田甲雖賈人有賢操始湯爲小吏與錢
通及爲大吏而甲所以責湯行義有烈士風湯爲御
史大夫七歲敗河東人李文故嘗與湯有隙已而爲
御史中丞薦數從中文事有可以傷湯者不能爲地
湯有所愛史魯謁居知湯弗平使人上飛變告文姦

事、事下湯、湯治論殺文、而湯心知謁居爲之上問、
事從迹安起、湯陽驚曰、此殆亡故人之怨之、謁居病臥
閭里主人、湯自往視病、爲謁居摩足、趙國以治鑄爲
業、王數訟鐵官事、湯常排趙王、趙王求湯陰事、上書
告湯大臣也、史謁居有病、湯至爲摩足、疑與爲大姦、
事下廷尉、謁居病死、事連其弟、弟繫導官、湯亦治它
囚、導官見謁居弟欲陰爲之、而陽不省、謁居弟不知、
怨湯、使人上書告湯與謁居謀共變、告李文、事下減
宣、宣嘗與湯有隙、及得此事、窮竟其事、未奏也、會人

有盜發孝文園瘞錢丞相青翟朝與湯約俱謝至前
湯念獨丞相以四時行園當謝湯無與也不謝丞相
謝上使御史案其事湯欲致其文丞相見知丞相患
之三長史皆害湯欲陷之始長史朱買臣素怨湯王
朝齊人以術至右內史邊通學短長剛暴人也官至
濟南相故皆居湯右已而失官守長史誡體於湯湯
數行丞相事知此三長史素貴常陵折之故三長史
合謀曰始湯約與君謝已而賣君今欲劾君以宗廟
事此欲代君耳吾知湯陰事使吏捕案湯左田信等

曰湯且欲爲請奏信輒先知之居物致富與湯分之
及它姦事事辭頗聞上問湯曰吾所爲賈人輒知益
居其物是類有以吾謀告之者湯不謝又陽驚曰固
宜有減宣亦奏謁居事上以湯懷詐面欺使使八輩
簿責湯湯具自道無此不服於是上使趙禹責湯禹
至讓湯曰君何不知分也君所治夷滅者幾何人矣
今人言君皆有狀天子重致君獄欲令君自爲計何
多以對爲湯廼爲書謝曰湯無尺寸之功起刀筆吏
陛下幸致位三公無以塞責然謀陷湯者三長史也

遂自殺湯死家產直不過五百金皆所得奉賜無它
贏昆弟諸子欲厚葬湯湯母曰湯爲天子大臣被惡
言而死何厚葬爲載以牛車有棺而無槨上聞之曰
○聖○主○非此母不生此子乃盡按誅三長史丞相青翟自殺
出田信上惜湯復稍進其子安世趙禹中廢已而爲
廷尉始條侯以爲禹賊深弗任及禹爲少府比九卿
禹酷急至晚節事益多吏務爲嚴峻而禹治加緩而
名爲平王溫舒等後起治酷於禹禹以老徙爲燕相
數歲亂悖有罪免歸後湯十餘年以壽卒于家

○江充

江充趙國邯鄲人充本名齊有女弟善鼓琴歌舞嫁之趙太子丹齊得幸於趙敬肅王太子疑齊以已陰私告王與齊忤使吏逐捕齊不得收繫其兄父按驗皆棄市齊遂絕迹亡西入關更名充詣闕告太子丹與同產姊及王後宮姦亂交迎郡國豪猾攻剽爲姦吏不能禁書奏天子怒遣使持節詔郡發吏卒圍趙王宮收捕太子丹移繫衛郡詔獄與廷尉雜治法至死趙王彭祖帝異母兄也上書訟太子臯言充逋逃小

臣苟爲姦僞激怒聖朝欲取必於萬乘以復私怨臣願選從趙國勇敢士從軍擊匈奴極盡死力以贖丹罪上不許竟敗趙太子以充爲直指繡衣使者督三輔盜賊禁察踰侈貴戚近臣多有儲充皆舉劾奏請沒入車馬令身待北軍擊匈奴矣可充卽移書光祿勳中黃門逮召近臣侍中諸當詰北軍者移劾門衛禁止無令得出入宮殿於是貴戚子弟惶恐皆見上叩頭求哀願得入錢贖罪上許之令各以秩次輸錢北軍凡數千萬上以充忠直奉法不阿所言中意充

出逢館陶長公主行馳道中充呵問之公主曰有太后詔充曰獨公主得行車騎皆不得盡効没入官後充從上甘泉逢太子家使乘車馬行馳道中充以屬吏太子聞之使人謝充曰非愛車馬誠不欲令上聞之以教敕臣素也唯江君寬之充不聽遂白奏上曰人臣當如是矣大見信用威震京師遷爲水衡都尉後上幸甘泉疾病充見上年老恐晏駕後爲太子所誅因是爲姦奏言上疾祟在巫蠱於是上以充爲使者治巫蠱充將胡巫掘地求偶人捕蠱及夜祠視鬼

染汗令有處輒收捕驗治燒鐵鉗灼強服之民轉相
誣以巫蠱吏輒劾以大逆無道坐而死者前後數萬
人是時上春秋高疑左右皆易為蠱祝詛有與人莫敢
訟其冤充既知上意因言官中有蠱氣先治後官希
幸夫人以次及皇后遂掘蠱於太子宫得桐木人太
子懼不能自明收充自臨斬之罵曰趙、虜前亂乃國
王父子不足耶廼復亂吾父子也太子由是遂敗後
武帝知充有詐夷充三族

○嚴延年

嚴延年字次卿東海下邳人父爲丞相掾延年少學法律丞相府歸爲郡吏以選除補御史掾舉侍御史是時大將軍霍光廢昌邑王尊立宣帝宣帝初卽位延年劾奏光擅廢立亾人臣禮不道奏雖寢然朝廷肅焉敬憚延年後復劾大司農田延年持兵干屬車反致譴責坐法至死延年亾命會赦出復爲掾宣帝識之拜平陵令坐殺不辜去官又爲丞相掾復擢好時令遷涿郡太守時郡比得不能太守涿人畢野白等由是廢亂大姓西高氏東高氏自郡吏以下皆畏

避之莫敢與。晤咸曰：寧負二千石，無負豪大家賓客。放爲盜賊，發輒入高氏，吏不敢追。浸浸日多，道路張弓拔刃，然後敢行。延年至，遣掾蠡吾趙繡按高氏。得其死罪，繡見延年新將，心內懼，卽爲兩劾，欲先白其輕者。延年意怒，廼出重劾。延年已知其如此矣。趙掾至，果白其輕者。延年索懷中，得重劾，卽收送獄。夜入晨將至市，論殺之。先所按者死，吏皆股弁，更遣吏分考兩高。窮竟其姦，誅殺各數十人。郡中震恐，三歲遷河南太守，賜黃金二十斤。豪彊脇息，野無行盜，威震

旁郡其治務在摧折豪彊扶助貧弱貧弱雖陷法曲
文以出之其豪傑侵小民者以文內之衆人所謂當
死者一朝出之所謂當生者詭殺之吏民莫能測其
意深淺戰栗不敢犯禁按其獄皆文致不可得反延
年爲人短小精悍敏捷於事雖子貢冉有通藝於政
事不能絕也吏忠盡節者^大厚遇之如骨肉皆親鄉出
身不顧以是治下無隱情然疾惡甚中傷者多尤
巧爲獄文善史書所欲誅殺奏成於手中主簿親近
吏不得聞奏可論死奄忽如神冬月傳屬縣囚會論

府上流血數里

極惡

故河南號曰屠伯。是時張敞爲京兆

尹，素與延年善，敞治雖嚴然尚頗有縱舍，聞延年用

刑刻急，以書諭之曰：昔韓盧之取菟也，上觀下獲，不

甚多殺，願次卿少緩誅罰，思行此術。延年報曰：河南

天下咽喉，二周餘斃，莠盛苗穢，何可不鉏？自矜其能，

終不衰止。時黃霸在潁川，以寬恕爲治，時年婁豐，鳳

皇來下，上賢霸，下詔稱揚其行，加金爵之賞。延年素

輕霸爲人，及比郡爲守，褒賞反在已前，心內不服。河

東界中又有蝗蟲，府丞義出行蝗，還見延年，延年曰：

此蝗豈鳳皇食邪義又道司農中丞耿壽昌爲常平倉利百姓延年曰丞相御史不知爲也當避位去壽昌安得權此後左馮翊缺上欲徵延年符已發爲其名酷復止延年疑少府梁丘賀毀之心恨會延年察獄史廉有臧不入身坐選舉不實貶秩延年笑曰後敢復有舉人者矣丞義年老頗悖素畏延年恐見中傷延年本嘗與義俱爲丞相史實親厚義無意傷義也饋遺義甚厚義愈恐自筮得死卦忽忽不樂因取告至長安上書言延年罪名十事已拜奏卽飲藥自

惡其了

冤、鬼、使、之

殺以明不欺事下御史丞按驗有此數事延年坐怨
望非謗政治不道棄市初延年母從東海來欲從延
年臘到雒陽適見報囚母大驚便止都亭不肯入府
延年出至都亭謁母母閉閣不見延年免冠頓首閣
下良久母乃見之因數責延年幸得備郡守專治千
里不聞仁愛教化有以全安愚民顧乘刑罰多殺欲
以立威豈爲民父母意哉延年服罪重頓首謝因自
爲母御歸府舍母畢正臘謂延年曰天道神明人不
可獨殺我不意當老見壯子被刑戮也行矣去女東

歸掃除墓地耳遂去歸郡見昆弟宗人復爲言之後
歲餘果敗東海莫不賢知其母延年兄弟五人皆有
吏材至大官東海號曰萬石嚴嫗次弟彭祖至太子
太傅

○裴延齡

裴延齡河中人盧杞秉政引爲膳部員外郎延齡素
不善財計乃取宿姦老吏與謀以固帝幸因建言左
藏天下歲入不貲耗登不可校請別舍以檢盈虛於
是以天下宿負八百萬緡析爲負庫抽貫三百萬緡

爲賸庫樣物三十萬緡爲季庫帛以素出以色入者
爲月庫帝皆可之然天下負皆窮人償入無期抽貫
與給皆盡樣物與帛固有籍延齡但多其簿最吏員
以詭帝實於財用無所加也俄奏請令京兆府以兩
稅青錢市草百萬圍送苑中宰相陸贄趙憬以爲若
市送百萬圍卽一府百姓自冬歷夏般載不了百役
供應須悉停罷請令府縣量市三二萬圍各貯近處
他時要卽支用不從他日帝謂延齡曰朕所居浴堂
殿一棟將壓念易之未能也延齡曰宗廟至重殿棟

微矣。且陛下本分錢用之。亾竊帝驚曰。本分錢柰何。對曰。此在經誼。愚儒不能知。按禮。天下賦三之一以充乾豆。一以事賓客。一君之庖厨。陛下所御饔飩。簡儉以所餘爲百官廩料。殫錢未盡也。則所不盡者爲本分錢。以治殿數十尚不乏。况一棟哉。帝領曰。人未嘗爲朕言之。又造神龍佛祠。須材五十尺。延齡妄奏同州得大谷木數十章。度皆八十尺。帝曰。吾聞開元時。近山無巨木。皆求之嵐勝間。今何地之近材之良邪。延齡曰。異材瑰產。處處有之。待聖主乃出。今生近

輔豈開元所當得也。帝悅。是時陸贄極論其譎妄。不可任。帝以爲排娼。愈益厚。延齡會鹽鐵使張滂。京兆尹李充。司農卿李錡。皆指延齡專以儉僞罔上。帝怒。乃罷贄宰相。左除滂等官。延齡又言贄等失權。怨望。天子惑之。乃下詔斥逐贄等。朝廷震恐。延齡資苛刻。又劫於利。專剝下。附上。肆騁譎怪。其進對皆他人莫敢言。而延齡言之不疑。亦人之所未聞者。帝頗知其詐。但以其不隱。欲聞外事故。斷用之。屬疾臥。策使者曰。三四輩旣死。悼念不已焉。初。陽城自處士爲諫議。

大夫天下皆想望風采既至官日夜痛飲韓愈作爭
臣論以諷之城亦不以屬意及贇等貶上怒未解中
外惴恐無敢救者戒卽帥拾遺王仲舒歸登等守延
英門上疏論延齡姦邪贇等無罪上大怒欲加城等
罪太子爲之營救乃解張萬福聞之伏延英門大言
賀曰朝廷有直臣天下必太平矣遂徧拜城與仲舒
等已而連呼太平萬歲萬福武人自此名重天下

○皇甫鏞

皇甫鏞登進士第累遷司農判度支改戶部侍郎憲

宗方伐蔡，鑄裒會嚴亟以辦濟師。帝悅，進兼御史大夫。蔡平，遂同平章事，猶領度支。崔羣、裴度極論鑄姦邪苛刻，其辭切至。帝以天下略平，欲崇臺沼宮觀，自娛。鑄與程異知之，故數貢羨財。又賂吐突承璀爲奧援，以故帝排衆論，決任之。反以度爲朋黨，不納其言。帝敕內帑所餘，詔度支評直，鑄貴售之，以給邊兵。故繒陳絲觸手輒壞，邊士怨恨，聚而焚之。裴度以聞，鑄指所著鞞曰：「此內庫所出，牢韌可服。」彼言不可信也。鑄又與金吾將軍李道古共薦方士柳泌，浮屠大通。

爲長年藥帝感之穆宗在東宮聞其姦妄始聽政貶
鍾崖州司戶叅軍卒泌自云能致不死藥因言天台
山仙靈所居多異草願官天台乃拜泌天台刺史賜
金紫諍臣固諫以爲列聖亦有寵方士者未嘗使牧
民帝曰煩一州而致長年于君父何惜乎乃不敢言
泌驅吏民采藥山谷鞭笞苛急竟無所獲懼詐窮舉
族遁去浙東觀察使捕得之鍾與道古管解復得待
詔翰林大通自言百五十歲及鍾事敗乃與柳泌并
誅泌繫京兆府獄吏責泌泌荅曰皆道古皇甫鍾教

我也

○蔡確

蔡確字持正晉江人父徙陳確有智數不謹細行第
進士調邠州司理叅軍以賄聞轉運使薛何行部欲
按治之見其儀觀秀偉召與語反以爲奇更加延舉
韓絳宣撫陝西見確所製樂語亦以爲材薦於開封
尹韓維維絳弟也維又薦之安石安石用鄧綰薦爲
監察御史裏行時開封府鞫伯州民訟事連判官陳
安民安民令其甥文及甫求援於宰相吳充之子安

持確言事關大臣非開封府可了遂移御史臺中丞
鄧潤甫御史上官均按之亦與開封府獄同事多不
讐王珪奏遣確詣臺參治確遂鍛鍊成獄潤甫均不
能制密奏確慘掠罪囚確伺知之詐使吏爲使者慮
問囚若稱冤輒加苦辱及帝連遣諫官內侍審直囚
皆怖畏言不冤矣由是潤甫均罷而確得中丞猶領
司農凡常平免役法皆成其手太學生虞蕃訟其學
官確深探其獄連引朝士自翰林學士許將以下皆
逮捕械繫令獄卒與同寢處飲食旋溷共爲一室設

大盆於前凡羹飯餅餌舉授其中以杓混擾分飼之如大豕久繫不問幸而得問則一一皆承遂効叅知政事元絳有所屬請出絳知亳州而確代其位確自知制誥爲御史中丞叅知政事皆以起獄奪人位而居之士大夫交口咄罵而確自以爲得計吳充數爲帝言新法不便確曰曹叅與蕭何有隙至代爲相一遵何約束且法陛下所建立一人協相而成之一人挾怨而壞之民何所措手足乎充屢屈法遂不變元豐五年拜尚書右僕射兼中書侍郎確旣相屢與羅

織之獄縉紳士大夫重足而立矣。初議官制蓋倣唐
六典事無大小並中書取旨門下審覆尚書受而行
之三省分班柄歸中書確說王珪曰公在相位久必
得中書令珪信之確乃言於帝曰三省長官位高不
須置令但令左右僕射分兼兩省侍郎足矣帝以爲
然故確名爲次相實顯大政珪以左僕射兼門下拱
手而已哲宗立確轉左僕射兼門下韓縝入相中書
用其兩姪爲列卿確風御史中丞劾縝始詔三省凡
取旨事及合諫官章疏並執政同進擬不專屬中書

蓋確畏失權又復改制也元祐元年罷確知陳州又奪職徙鄧州初神宗疾革王珪議建儲事確與同列皆在側知狀及確出守鄧陰與章惇邢恕等合謀謂珪當日懷異意賴已擁護故不得逞欲以上誣高太后下陷珪等結帝之歡以固寵專權賴故諫議大夫張燾范祖禹司諫吳安詩王巖叟正言劉安世等連上章乞正確罪乃復責確英州別駕新州安置確遂卒于貶所先是神宗謂執政曰御史大夫非司馬光不可王珪憂甚計不知所出確曰陛下久欲收靈武

公能任責則相位可保也珪喜謝確珪遂薦俞克師
慶使上平西夏策珪意以爲止旣用兵必不召光雖
召光必不至已而果不召光永樂之敗死者十餘萬
人珪實爲之而確實啓之也珪自執政至宰相凡十
六年率導諛將順當時目爲三旨宰相以其上殿進
呈云取聖旨上可否訖領聖旨退諭稟事者云得聖
旨也

○邢恕

恕陽武人從程顥學因出入司馬光呂公著之門神

宗不豫恕與蔡確密謀語宣仁后之姪公繪曰家有
白桃著花道書言可療上疾邀與歸視之至則執其
手曰蔡丞相令布腹心上疾不可諱延安冲幼雍曹
皆賢王也公繪驚曰此何言哉君欲禍吾家耶急趨
出恕計不行反宣言太后屬意雍王與王珪爲表裏
恕因導確約珪入問疾陽鈞致珪語使知開封府蔡
京伏劒士於外須珪小持異則執而誅之旣而珪言
上自有子定議立延安矣恕益無所施哲宗立遷起
居舍人又爲公繪具奏乞尊崇朱太妃爲高氏異日

計后詰之曰汝素不識字誰爲之者公繪不得隱以
恕對其上其藁恕遂出知隨州恕久斥外蓄憤恕間
道謁確於鄧州時確再貶守鄧也恕遂與確謀日者
所造定策事及司馬康赴闕恕招康道河陽因勸康
作書稱確康與恕同年登科恕又出其父光門下信
之恕本意謂康司馬光之子也旣云爾則確定策事
可信無疑會吳處厚梁燾等奏確與恕咸指康書爲
証故確遂遠竄恕亦坐責監永州酒稅章惇蔡卞得
政復引恕自助召爲御史中丞恕旣處風憲遂証宣

仁后有廢立謀、又教蔡懋上文及甫私牘、歷詆梁燾、
劉摯云陰圖不軌、加司馬光呂公著以凶悖名、悖使
蔡京置獄於同文館、組織萬端、將悉陷諸人於族、有
高士京者、嘗與恕同官、恕一日置酒問曰、公知元祐
間、獨不與先公推恩否、士京曰、不知、又問有兄弟無、
士京曰、有兄士充已死、恕曰、此乃傳王珪語言之人
也、當是時、王珪爲相、欲立徐王、遣公兄士充傳道語、
言禁中知否、士京曰、不知、恕因誘士京以官爵、曰、公
不可言、不知、當爲公作此事、因令所親信爲士京作

奏上之珪由是得罪而恕得數登對後揣帝薄惇屢言惇短故爲惇所陷出知汝州徽宗初蔡京當國經營湟鄯起恕爲鄜延經略安撫使旋改涇原恕乞築蕭關采車戰法爲淺攻計又欲使熙河造船直抵興靈以空夏國巢穴其謀皆迂誕類兒戲不可用帝亦燭其妄而京力主之已而夏人寇鎮戎欲趨渭州警奏至京師京懼恕乃奪職卒年七十恕本從程門得游諸公卿間而反覆行險爲司馬光客卽陷司馬光附章惇卽背章惇至與三蔡爲心腹上謗母后下誣

忠良非宜仁后聖慈深信帝心中外咸戴則禍及宗社矣

○史嵩之 附彌遠

嵩之彌遠之姪歷進士累官知襄陽府嵩之既相一時正人如杜範游似李韶趙汝騰等皆以不合逐去淳祐四年嵩之遭父喪起復太學生黃愷伯等皆上書論之不報及杜範入相延徐元杰議政事六月朔元杰嘗侍立先一日謁左相范鍾歸而熱大作夜四鼓指爪忽裂遂死三學諸生相繼伏闕上言昔小人

傾君子者不過使之死于蠻煙瘴雨之鄉。今蠻煙瘴雨不在嶺海而在朝廷矣。詔付臨安府鞫治。常所給使之入獄。迄無成。劉漢弼亦每以奸邪爲慮。未幾腫疾暴死。杜範入相八十日。卒時謂諸公皆中毒。堂食無敢下筯者。初嵩之從子璟卿嘗以書諫曰。伯父秉天下之大政。未聞辦天下之大事。徒聞包苴公行政。出多門。便嬖私昵。狼狽萬狀。自開督府。東南民力困於供需。州縣倉卒匱於應辦。輦金帛。輓芻粟者絡繹於道路。一則曰督府。二則曰督府。不知所幹者何事。

所成者何功近聞蜀州不守議者多歸咎退師於鄂之失何者分戍列屯備邊禦戎首尾相援如常山之蛇維揚則有趙葵廬江則有杜伯虎金陵則有劉之傑爲督府者宜據鄂渚形勢之地西可以援蜀東可以救淮北可以鎮荆湖不此之圖盡損藩籬深入堂奧伯父謀身自固之計得矣其如天下蒼生何是以飢民叛將乘虛入擣侵軼於沅湘搖蕩於鼎澧江陵之勢苟孤則武昌亦未易守荆湖之路有警則江浙諸郡又焉得高枕而臥也況殺降失信則前日徹疆

之計不可復用矣。內地失護，則前日清野之策不可復施矣。此隙一開，東南生靈特几上之肉耳。宋室南渡之疆土，惡能保其金甌之無闕也。人謂禍起蕭牆，危如朝露，此愚所痛心疾首爲伯父苦口極言者也。居無何而璟卿又暴卒。

史彌遠，慶元鄞人，宰相浩之子也。淳熙十四年，舉進士，韓侂胄誅彌遠，相寧宗共十有七年。寧宗崩，彌遠廢濟王，立理宗。又獨相九年，擅權用事，專任儉王理宗。德其立已之功，雖臺諫言其姦惡弗恤也。濟王竑

者孝宗子魏王愷子柄之嗣子也柄薨封沂王初柄無子詔以竑爲其後及太子詢薨上乃立竑爲皇子竑好鼓琴彌遠買媼人善鼓琴者納諸御而厚廩其家使媼人矚竑動息以告美人知書慧黠竑嬖之宮嬖有輿地圖竑指瓊厓曰吾他日得志置史彌遠於此父常呼彌遠爲新恩以他日非新州則恩州也竑又書字於几曰彌遠當決配八千里竑左右皆彌遠心腹彌遠日夕思以處竑而竑不知真德秀時兼宮教因力辭去位臨行諫曰上子若能孝于慈母而敬

大臣則天命歸之矣不然可慮也宗子貴誠初名與
莒係燕懿王德昭之後其母全氏家于山陰初慶元
人余天錫爲彌遠府童子師彌遠以帝未有儲嗣而
沂王亦未有後欲借沂王置後爲名陰擇宗室可立
者以備皇子之選會天錫告還鄉彌遠密語之曰沂
王無後宗子賢者幸具以來天錫抵紹興會大雨過
全保長家保長知其爲丞相館客具雞黍甚肅須臾
二子立侍保長曰此吾外孫趙與莒與芮也日者嘗
言二兒後當極貴天錫因憶彌遠言及還臨安以告

彌遠乃使天錫密語保長載至臨安補與苕秉義郎
賜名貴誠立爲沂王後更名昀十七年帝大漸彌遠
夜召昀入宮立爲皇子卽帝位而廢竑爲濟王彌遠
及鄭清之之謀也

藏書賊臣傳卷五十一

○逆賊

○董卓

董卓臨洮人卓膂力過人雙帶兩鞬左右馳射爲羌胡所畏中平三年韓遂馬騰反圍陳倉拜卓前將軍與左將軍皇甫嵩擊破之六年徵卓爲少府不肯就靈帝寢疾璽書拜卓爲并州牧令以兵屬皇甫嵩卓復不受命及帝崩大將軍何進司隸校尉袁紹謀誅宦官而太后不許乃私呼卓將兵入朝以脅太后卓

得召、卽時就道上書曰、中常侍張讓等、竊倖承寵、濁亂海內、臣聞揚湯止沸、莫若去薪、潰癰雖痛、勝於內食、昔趙鞅興晉陽之甲、以逐君側之惡、今臣輒鳴鍾鼓、如洛陽、請收讓、以清姦穢、卓未至、而何進敗虎賁中郎將袁術、乃燒南宮、欲討宦官、而中常侍段珪等劫少帝及陳留王、夜走小平津、卓引兵急進、未明到城西、聞少帝在北芒、因往迎帝、帝見卓將兵卒至、恐怖滄泣、卓與言不能辨、與陳留王語、遂及禍亂之事、卓以王爲賢、且爲董太后所養、卓自以與太后同族、

有廢立意。初卓之入也，步騎不過三千，自嫌兵少，恐不爲遠近所服。率四五日輒夜潛出軍，近營明旦乃大陳旌鼓而還，以爲西兵復至。尋而何進及弟苗先所領部曲皆歸於卓。卓又使呂布殺執金吾丁原而并其衆。卓兵士大盛，乃廢帝爲弘農王而立陳留王。是爲獻帝。又以何太后賊迫永樂太后，至今憂死。逆婦姑之禮，遷於永安宮，遂以弑崩。是時洛中貴戚室第相望，金帛財產家家殷積。卓縱放兵士大掠淫虜，婦女謂之搜牢。人情崩潰。卓又姦亂公主妻，略宮人。

恣意殺虐時有會於社下者悉令就斬之駕其車重截其婦女以頭繫車轅歌呼而還又壞五銖錢更鑄小錢悉取洛陽及長安銅人鍾虡飛廉銅馬之屬以充鑄時以爲秦始皇見長人於臨洮乃鑄銅人卓臨洮人也而今毀之雖成毀不同凶暴相類焉初入京師雖行無道而猶忍性矯情擢用羣士任吏部尚書周怱侍中伍瓊以尚書韓馥爲冀州刺史侍中劉岱爲兖州刺史孔伷爲豫州刺史張咨爲南陽太守初平元年馥等到官與袁紹各興義兵同盟討卓而伍

瓊周玘陰爲內主黃巾餘黨又衆十餘萬轉寇太原
破河東卓遣中郎將牛輔擊之不能却及聞東方兵
起乃鳩殺弘農王欲徙都長安太尉黃琬司徒楊彪
爭之不能得而佐瓊周玘又固諫卓因大怒曰卓初
入朝二子勸吾用善士而諸君到官卽舉兵相圖此
二君賣卓卓何用相負遂斬瓊玘而遷西都初長安
遭赤眉之亂宮室營寺焚滅無餘於是盡徙洛陽數
百萬人口於長安步騎驅蹙更相蹈籍飢餓寇掠積
尸盈路卓自屯留畢圭范中悉燒洛陽宮廟官府人

家二百里內無復孑遺。又使呂布發諸帝陵及公卿以下冢墓，收其珍寶而入長安。百官奉迎拜揖。卓遂僭擬車服，乘蓋，兄弟諸子皆典兵事，結壘于長安城東以自居。又築塢於郿，高厚七丈，號曰萬歲塢，積穀爲三十年儲。自云事成，雄據天下，不成，守此足以畢老。嘗至郿行塢，公卿以下祖道於橫門外。卓施帳幔，飲設誘降北地反者數百人於中，殺之，先斷其舌，次斬手足，次鑿其眼目以鑊煮之。未及得死，偃轉杯案間，會者戰慄，亡失匕箸。而卓飲食自若。諸將有言語

蹉跌便戮於前時王允與呂布及僕射士孫瑞謀誅
卓有人書呂字於布上負而行於市歌曰布平布平
三年大會未央殿卓朝服升車陳兵夾道自壘及宮
左步右騎屯衛周匝令呂布等扞衛前後王允乃與
士孫瑞密表其事使瑞自書詔以授布令騎都尉李
肅與布同心勇士十餘人僞着衛士服於北掖門內
以待卓卓將至馬驚不行怪之欲還呂布勸令進遂
入門肅以戟刺之衷甲不入傷臂墮車顧大呼曰呂
布何在布曰有詔討賊卓大罵曰庸奴敢如是邪布

應聲持矛刺卓，趨兵斬之，馳齎赦書以令宮陛。內外士卒皆稱萬歲，百姓歌舞於道。長安中，士女賣其珠玉衣裝，市酒肉相慶者，填滿街肆。乃尸卓於市，天時始熱，卓素充肥，脂流於地。守尸吏燃火置卓臍中，光明達曙，如是積日。又聚董氏之尸焚之，塢中珍藏有金三萬斤，銀九萬斤，錦綺纈縠，統素奇玩如丘山。積呂布、五原人以弓馬驍武，給并州刺史。丁原爲騎都尉，甚見親待。靈帝崩，原受何進召，將兵詣洛陽會進。敗董卓，誘布殺原而并其兵。卓以布爲騎都尉，並爲

父子甚愛信之行止嘗以布自衛布嘗小失卓意卓
拔手戟擲之布拳捷得免而改容謝卓卓亦解布由
是陰怨卓卓又使布守中閤而私與傅婢通又不自
安因往見司徒王允自陳卓見殺之狀時允與尚書
僕射士孫瑞密謀誅卓因以告布使爲內應布曰如
父子何曰君自姓呂本非骨肉今憂死且不暇擲戟
之時豈有父子情也布許之乃於殿門刺殺卓允以
布爲奮威將軍封溫侯及卓將李傕等相結還攻長
安布與傕戰敗乃將數百騎以卓頭繫馬鞍走出武

關奔南陽袁術術待之甚厚布自恃殺卓有德袁氏
恣兵抄掠術患之布復去從張揚時李傕等購募求
布急揚諸將皆欲圖之布懼謂揚曰與卿州里今見
殺其功未必多不如生賣布可大得爵寵有頃布得
走投袁紹紹與布擊張燕於常山燕精兵萬餘騎數
千匹布嘗御良馬號曰赤兔能馳城飛塹與其健將
數十騎馳突燕陣一日或至三四皆斬首而出遂破
燕軍布既恃其功更請兵於紹紹不許布不自安因
求還洛陽紹遣壯士送布而陰使殺之布疑其圖已

乃使人鼓箏於帳中，潛自遁出。及夜起兵，而布已亡歸陳留。太守張邈矣。邈與弟超及陳宮等迎布爲兗州牧，據濮陽郡縣皆應之。曹操聞而引兵擊布，時劉備領徐州居下邳，與袁術相距於淮上。術欲引布擊備，乃與布書，許助軍糧。布得書大悅，卽勒兵襲下邳，獲備妻子。備敗走海西，飢困請降於布。布亦志術糧不復繼，乃具車馬迎備，以爲豫州刺史，遣屯小沛。布自號徐州牧，術懼布爲害，復遣人與布求婚，而遣紀靈等將步騎二萬攻備。備求救於布，布謂靈曰：「玄德

布弟也。今爲諸君所困，故來救之。布性不喜合鬪，但喜解鬪耳。乃令軍候植戟於營門，彎弓顧謂曰：「諸君觀布射戟，小支中者，當各解兵；不中，可留決鬪。」布一發，正中戟支。靈等皆驚，遂罷去。及術遣韓胤來迎婦，陳珪不欲布與術成姻，往說布曰：「曹公奉迎天子，輔贊國政，將軍宜與協謀。今與袁氏姻，必受不義之名矣。布亦素怨術，而女已在途，乃追還，執胤送許，曹操殺之。」陳珪復使子登詣操，因言：「呂布勇而無謀，輕於去就，操拜登爲廣陵太守，臨別執登手，令陰合部衆。」

以爲內應時布因登欲求徐州牧登還布怒拔戟所
几曰卿父勸布協同曹操絕婚公路今吾所求無獲
而卿父子並顯重但爲卿所賣耳登不爲動徐對之
曰登見曹公言養將軍辟如養虎當飽其肉不飽則
將噬人曹公曰不如卿言辟如養鷹飢卽爲用飽卽
颺去其言如此布意乃解袁術怒布殺韓胤遣其大
將與韓暹楊奉連勢攻布布時兵只二千馬四百匹
懼不敵謂陳珪曰今致術軍卿之由也爲之柰何珪
曰暹奉與術卒合之師爾謀無數定子登策之比之

連雞執不俱棲立可離也布用珪策與暹奉書暹奉大喜遂共擊術建安二年布復從袁術遣高順攻劉備於沛破之操乃自將擊布至下邳城下遺布書爲陳禍福布欲降而陳宮等自以負罪於操深沮其計謂布曰曹公遠來勢不能久將軍若以步騎出屯于外宮將餘衆閉守於內若向將軍宮引兵而攻其背若但攻城則將軍救於外不過旬月軍食已盡擊之可破也布然之布妻曰昔曹氏待公臺如赤子猶舍而歸我今將軍厚公臺不過於曹氏而欲委全城捐

妻子孤軍遠出乎若一旦有變妾豈得爲將軍乎
布乃止曹操圍城三月上下離心布乃降布見操曰
今日已往天下定矣操曰何以言之布曰明公之所
患不過於布今已服矣令布將騎明公將步天下不
足定也顧謂劉備曰玄德卿爲上客我爲降虜繩縛
我急獨不可一言取操笑曰縛虎不得不急乃命緩
布縛劉備曰不可明公不見呂布事丁建陽董太師
乎操頷之布目備曰大耳兒最叵信操謂陳宮曰公
臺平生自謂智有餘今何如官指布曰是子不用官

言以至於此若見從未可量也操又曰柰卿老母何
宮曰老母在公不在宮也夫以孝理天下者不害人
之親操復曰柰卿妻子何宮曰宮聞霸王之主不絕
人之祀固請就刑遂出不顧操爲流涕布及宮順皆
被殺卓吾曰此段妙甚英雄問荅如見也

○王敦

敦字處仲司徒導之從父兄也敦少有奇人之目尚
武帝女襄城公主拜駙馬都尉元帝初鎮江東以敦
爲元帥進鎮東大將軍江州刺史封漢安侯敦始自

置兼統州郡專擅之迹盛矣時劉隗用事頗踈間
王氏敦上䟽訟導功德表至導封還敦敦復遣入奏
敦初有重名又立大功旣專閫外之寄手控強兵羣
從貴顯故帝畏而惡之而引劉隗刁協等以爲心膂
敦不能平將作亂謂謝鯤曰劉隗姦邪將危社稷吾
欲除君側之惡何如鯤曰隗誠始禍然城狐社鼠敦
怒曰君庸才豈達大體卽率衆內向以誅隗爲名帝
遣王廙往諭敦敦不從復留之廙更爲敦用及敦至
據石頭歎曰吾不復爲盛德事矣放縱兵士大肆劫

掠內外百官皆奔散，乃協至江乘，爲人所殺，送首於
敦隗。奔後趙，官至太子太傅而卒。帝令百官公卿詣
石頭見敦，自西都覆沒，四方皆勸進敦。時惠帝年長，
難制，欲更議所立。王導不從，及敦克建康，謂導曰：「不
用吾言，幾至覆族。」至是，敦以太子有勇略，欲誣以不
孝罪，廢之，得溫嶠辨說，敦謀乃沮。敦遂收周顗并戴
淵，殺之。帝使侍中王彬勞敦，彬素與顗善，先往哭顗，
然後見敦。敦恠其容慘，問之，彬曰：「向哭伯仁，情不能
已。」因數敦曰：「公抗旌犯順，殺戮忠良，圖爲不軌，禍及

門戶矣。辭氣慷慨，聲淚俱下。敦大怒，厲聲曰：「小兒狂悖至此！」王導勸彬起謝。彬曰：「脚痛不能拜。」敦曰：「脚痛孰如頸痛？」敦改易百官及諸軍鎮，轉徙黜免者以百數。朝行幕改，惟意所欲。將還武昌，謝鯤言曰：「公至都來稱疾不朝，今若朝天子，使君臣釋然，則物情自服。」敦曰：「君能保無變乎？」鯤曰：「公若入朝，鯤請侍從。」敦勃然曰：「正復殺君等數百人，亦復何損？竟不朝而去。」還屯武昌，以兄含爲荊州刺史，以義陽太守任愔督河北諸軍事。敦又自督寧益二州。帝憂憤成疾而崩。太

寧元年，敦移鎮姑孰。明帝使侍中阮孚賁牛酒犒勞敦，稱疾使主簿受詔。敦以王導爲司徒，而自爲楊州牧。又以王含都督楊州，江西諸軍事。從弟舒爲荊州，彬爲江州。以沈充、錢鳳爲謀主，鄧嶽、周撫、謝雍爲爪牙。敦無子，養含子應爲子。及敦病，拜應爲武衛將軍。以自副。錢鳳謂敦曰：「脫不諱，便當以後事付應耶？」敦曰：「非常之事，豈常人所能？我死之後，若解衆放兵歸身，朝廷保全門戶計之上也；退還武昌，收兵自守，貢獻不廢，亦中計也；及吾尚存，悉衆而下，萬一僥倖計。」

之下也。鳳謂其黨曰：公之下計，乃上策也。遂與沈
定謀，須敦死後作難。帝欲討敦，知其爲物情所畏，乃
僞言敦死，下詔討鳳等。餘皆不問。敦聞詔，病轉篤，乃
以含爲元帥，上疏罪狀溫嶠，導遺含書曰：今日之舉，
謂可得如大將軍昔年之事乎？昔年佞臣亂朝，人懷
不寧，今大將軍來屯於湖，漸失人心。先帝中興遺愛，
在人。聖主聰明，思與賢哲弘濟時艱。劉遐、蘇峻不謀
同辭，導雖不武，情在寧國。謹明目張膽，以爲六軍之
首矣。願速建大計，惟取錢鳳一人，事猶可追。宜早思

之及含軍敗敦聞而怒曰我兄老婢耳門戶衰世事去矣我當力行因作勢而起困乏復臥鳳等至京師帝親率六軍以禦鳳頻戰破之俄而敦死周光斬錢鳳吳儒斬沈充並傳首京師有司議曰王敦滔天作逆宜依崔杼王凌故事剖棺戮尸以彰元惡於是發瘞出尸焚其衣冠跽而刑之

○桓溫桓玄

桓溫桓彝之子也生未期溫嶠見之曰此兒有奇骨可試使啼及聞其聲曰真英物也彝以嶠所賞故名

之曰溫蘇峻之亂尋守宣城爲峻將江藩所害及溫年十八而播已死播子彪兄弟三人常置刃杖中以爲溫備溫詭弔賓以進手刃彪并追及二弟皆殺之時人偉焉溫豪爽有風槩面有七星劉惔嘗稱之曰眼如紫石稜鬚作蝟毛磔孫仲謀晉宣王之流亞也選尚南康長公主拜駙馬都尉庾翼常薦溫於明帝曰桓溫有雄略願陛下勿以常婿畜之翼卒以溫爲荊州刺史假節永和二年溫帥衆伐蜀時朝廷以蜀險遠溫兵寡少而深入敵境將佐亦以爲不可獨

江夏相袁喬勸之曰經略大事固非常情所及智者
了於胸中不必衆言皆合也今爲天下之患者胡蜀
二寇而已蜀雖險固比胡爲弱將欲除之宜先其易
李勢無道臣民不附戰備不修若以精卒萬人輕齎
疾趨可一戰擒也溫從之至彭模議者欲分爲兩軍
異道俱進以分漢兵之勢袁喬曰今懸軍深入勝則
大功可立不勝則唯類無遺若分兩軍則衆心不一
萬一偏敗大事去矣不如全軍而進溫乃命參軍周
楚孫盛守輜重自將步卒直指成都溫三戰三捷李

勢悉衆與溫戰於笮橋，參軍龔護戰沒，衆懼欲退。而鼓吏誤鳴進鼓，於是勢衆大潰。溫乘勝直進至晉壽，葭萌城勢乃面縛與視，請命溫解縛焚視，送於京師。振旅還江陵，進位征西大將軍，開府，封臨賀郡公。及石虎死，溫欲率衆北征，朝廷憚之。會稽王昱以殷浩夙有盛名，乃引爲心膂，與參綜朝權，欲以抗溫。溫甚忿恨，然素知浩弗之憚也。以國無他釁，遂得相持彌年。雖有君臣之跡，羈縻而已。八州士衆資調皆不爲國家用。溫遂復統步騎四萬發江陵伐秦，秦主苻健

深溝自固、芟苗清野、溫軍糧不屬而還、初溫自以雄姿風氣、是宣帝劉琨之儔、及是征還於北方、得一巧作老婢、訪之、乃琨妓女也、一見溫、便潛然而泣、問其故、荅曰、公甚似劉司空、溫大悅、出整理衣冠、又呼問之、婢云、面甚似恨、薄眼甚似恨、小鬚甚似恨、赤形甚似恨、短聲甚似恨、雌溫於是褫冠解帶、昏然而睡、不怡者數日、溫欲脩復園陵、移都洛陽、表疏十餘上朝、廷憂懼、將遣侍中止之、楊州刺史王述曰、溫欲以虛聲威朝廷、非事實也、但從之、自無所至、事果不行、又

議欲移洛陽鍾虞述曰永嘉不競暫都江左方當蕩
平區宇旋軫舊京若其不爾宜改遷園陵不應先事
鍾虞也溫復自江陵北伐師次伊水姚襄距水而戰
溫結陣而前親披甲督諸將奮擊襄大敗奔平陽溫
屯故太極殿前謁先帝諸陵遂旋軍升平中改封南
郡公溫或臥對親寮曰爲爾寂寂將爲文景所笑旣
而撫枕起曰旣不能流芳後世不足復遺臭萬載邪
太和四年溫請與郗愔及刺史桓冲袁真等我燕自
兖州入郗超曰道遠汴水又淺恐漕運難通溫不從

至金鄉天旱水道絕溫使人鑿鉅野三百里引汶水
會于清水引舟自清水入河郃超曰清水入河難以
通運若寇不戰運道又絕因敵爲資復無所得此危
道也不若盡舉見衆直趨鄴城溫又不從七月溫至
枋頭與燕慕容垂戰不利糧儲復竭乃焚舟棄輜重
自東燕出倉垣鑿井而飲行七百餘里燕諸將爭欲
追溫吳王垂曰不可溫初退必嚴設備簡精銳爲後
拒擊之未必得志不如緩之俟其力盡氣衰然後擊
之乃帥八千騎徐躡其後溫果兼道而進數日垂告

諸將曰可擊矣乃追及溫于襄邑范陽王德先帥精騎四千伏于襄邑東澗中與垂夾擊溫大破之斬首三萬級又邀擊於譙破之死者復萬計溫初欲立功河朔以收時望還受九錫及枋頭之敗名位頓減超曰明公不僞伊霍之舉者無以立大威權溫遂與之定議以帝素謹無過而牀第易誣乃言帝早有痿疾諷褚太后請廢帝立會稽王昱溫乃集百官于朝堂宣太后令廢帝復弑之并殺其母及三子而立簡文及簡文帝崩孝武卽位溫入朝赴山陵或云因此欲

殺王謝內外懷懼溫既至乃收尚書陸始付廷尉既登車謂從者曰先帝向遂靈見衆亦見溫將拜時頻言臣不敢溫又問左右殷涓形狀荅者言涓肥而短溫云向亦在帝側初殷浩爲溫所廢死浩子涓不詣而與武陵王晞游故溫疑而害之竟不識也及是見涓爲祟遂遇疾死相冲先問溫以謝安王坦之所任溫曰伊等不爲汝處分冲後代溫鎮姑孰既居任盡忠帝室栢玄溫之孽子也形貌瓌奇風神疎朗博綜藝術常負其才地以雄豪自處太元末出補義興太

守鬱鬱不得志、登高望震澤而歎曰、父爲九州伯、兄爲五湖長、遂棄官歸。及殷仲堪失職、倚玄等爲援、乃以子弟交質、共相結約、推玄爲盟主。玄始得志、乃連名上疏、申理王恭、求誅尚之、牢之等。朝廷深憚之、詔以玄都督荆襄雍秦梁益寧七州、後將軍、荊州刺史、假節。玄上疏固爭、江州於是進督八州、及楊豫八郡。復領江州刺史。玄遂樹用腹心、兵馬日盛。屢上疏求討孫恩、建牙聚衆、外託勤王、實欲觀釁而進也。元興初、司馬元顯稱詔伐玄。玄欲退保江陵、以待之。長史

下範之進說曰、公英畧威名振于天下、元顯口尚乳
臭、劉牢之大失物情、若兵臨近畿、示以威賞、則土崩
之勢、可翹足而待、何有延敵入境、自取蹙弱者乎、玄
大悅、率衆下至尋陽、移檄京邑、罪狀元顯、至新亭、元
顯自潰、玄遂入京師、自禍難屢構、干戈不戢、百姓厭
之、思得寧一、及玄初至、黜凡佞、擢雋賢、京師欣然、已
乃陵侮朝廷、幽擯宰輔、豪奢縱欲、衆務繁興、而朝野
復失望矣、十一月、玄矯詔使王謐兼太保、領司徒、奉
皇帝璽、禪位於已、玄僞讓、朝臣固請、玄乃立郊登壇、

篡位玄自篡盜之後，驕奢荒侈，遊獵無度，以百姓疲苦，怨思亂者十室八九。於是劉裕、劉毅、何忌等共謀興復，遂誅玄。

○安祿山史思明

安祿山，管州柳城胡也。祿山伎忍多智，善測人情，通六蕃語。張守珪節度幽州，祿山盜羊而獲，守珪將殺之，壯其語，因釋不殺。祿山遂乞與守珪爲養子，擢幽州節度副使、御史中丞。張利貞採訪河北，祿山百計媚事之，多出金帛結其左右。利貞入朝，盛言祿山乃

授營州都督自是使者往來一口同稱玄宗始以爲才天寶元年以平盧爲節度祿山爲使兼押兩蕃渤海黑水四府經畧使又代裴寬爲范陽節度河北採訪使仍領平盧三年祿山入朝北還詔中書門下尚書三省長官御史中丞俱餞鴻臚亭祿山陽爲不敏承間奏曰臣生蕃戎寵榮過甚無異材可堪委托願以身爲陛下死天子以爲誠憐之令見太子不拜祿山曰臣不識太子何官也帝曰太子者吾百歲後將付以此位者也祿山卽佯驚謝曰臣愚知陛下不知

太子罪當萬死乃拜時楊貴妃有寵祿山請爲貴妃
兒每拜必先妃而後帝帝怪之祿山對曰蕃人先母
而後父帝大悅六載進御史大夫林甫以宰相貴甚
羣臣無敢鈞禮祿山恃恩入謁林甫欲諷寤之使與
王鉞偕鉞亦位大夫林甫見鉞趨拜卑約祿山惕
然不覺自罄折林甫興語揣知其意便迎折之祿山
大駭故每見林甫雖盛寒必流汗林甫亦稍厚之引
至中書覆以已袍祿山大德林甫呼爲十郎祿山還
鎮留麾下駱谷居京師駱谷每奏事還祿山必先問

十郎何如有好言輒喜若謂大夫好檢校則反手據牀曰我且死晚益肥腹緩及膝奮兩肩若挽牽者然作胡旋舞帝前乃疾如風帝視其腹曰胡腹中何有而大荅曰唯赤心耳帝爲起第京師服御等雖乘輿不能過焉時太平久人忘戰帝春秋高嬖豔鉗固李林甫楊國忠更持權綱紀大亂祿山計天下可取逆謀日熾又自以無功而貴見天子盛開邊乃結契丹諸酋大置酒旣酣悉斬其首先後殺數千人獻馘闕下帝不之審卽賜祿山鐵券封柳城郡公進爵東平

王九歲兼河北道採訪處置使祿山又求兼河東
遂拜河東節度使既兼制三道意益侈十一載率河
東兵討契丹祿山中流矢走平盧祿山不得志乃上
言欲悉兵討契丹以報帝詔朔方節度使何布思會
討之布思多權畧祿山素忌其才欲襲取之故表請
自助布思懼轉入漠北爲回紇所畧奔葛邏祿祿山
厚募其部落降之葛邏祿懼執布思送北廷獻之京
師祿山已得布思之衆兵益雄愈偃肆太子及宰相
屢言祿山反帝皆不信至是國忠建言乞追還朝以

使林甫在未敢爾也

驗厥狀祿山得其謀卽馳入謁帝意遂安十三載來
朝謁華清宮對帝泣曰臣蕃人不識文字陛下擢以
不次國忠因是必欲殺臣帝慰解之拜尚書左僕射
詔還鎮又請爲開廐隴右羣牧等使祿山旣摠閑牧
因擇良馬內范陽又奪張文儼馬牧反狀明白人告
言者帝必縛與之十四年祿山奏請以蕃將三十二
人代漢將韋元素謂楊國忠曰祿山久有異志今又
有此請其反明矣他日二人見上言曰臣有一策可
以坐消祿山反謀若除祿山平章事召詣闕以賈循

呂知誨楊光嗣分領范陽平盧河東節度則勢自分矣上從之已草制而又不發更遣中使以珍果賜祿山欲以潛察其變中使受賂還言祿山無反心上謂國忠等曰朕推心待之保無異志卿等勿憂也冬十一月祿山反范陽祿山詐爲勅書示諸將曰有密旨令將兵入朝討楊國忠遂濟河下陳留滎陽遂入關上走蜀至咸陽望賢宮日向中猶未食民獻糲飯雜麥豆皇孫輩爭以手掬食之有老父郭從謹進言曰祿山包藏禍心固非一日有告者陛下徃徃誅之使

得逞其姦逆致陛下播越臣猶記宋璟爲相數進直言天下賴以安寧自頃以來在廷之臣以言爲諱闕門之外陛下皆不得知草野之臣必知有今日久矣但九重嚴邃區區之心無路上達事不至此臣可由得睹陛下之面而訴之乎上曰朕之不明悔無所及慰諭而遣之命軍士散詣村落求食夜將半乃至金城百姓皆走驛館無烟相與枕藉而寢貴賤無復辨識矣次馬嵬乃賜國忠及貴妃死祿山遂僭號東京是年太子卽位靈武時賊將旣陷長安日縱聲色財

利故車駕入蜀無進躡之患肅宗北行亦無西顧憂
祿山旣老愈肥目復盲又得疽疾性卞躁左右給侍
無罪輒死祿山子慶緒乃與李猪兒共殺祿山慶緒
襲位後爲官軍所敗走歸史思明思明殺之祿山父
子僭位僅三年

史思明突厥種與安祿山共鄉里先祿山一日生故
長相善爲互市郎負官錢無以償將走奚未至爲邏
騎所困欲殺之思明給曰我使人也若聞殺天子使
者其國不祥不如以我見王王活我功自汝得之邏

以爲然送。至王所。思明見王。不拜曰。天子使見小國。君不拜禮也。王怒。然疑其真使者。卒館待以禮。將還。令百人從入朝。奚有步將鎖高者。名聞中國。思明欲擒之以贖罪。詠王曰。從我者雖多。然可與見天子者。惟高耳。王悅。命高將帳下三百與之俱。旣至平盧。思明密遣人謂戎主曰。奚兵數百。外稱入朝。內實爲盜。請備之。主潛師迎犒。殺其衆。囚高以獻。張守珪奇其功。表爲捉生。天寶初。累功至將軍。知平盧軍事。入奏。帝賜坐。與語。奇之。問年。曰。四十矣。撫其背曰。爾貴在。

晚勉之祿山反使思明畧定河北已復留思明守
陽祿山陷兩京常以橐駝載禁府珍寶貯范陽思明
見其富强憫然欲自取之遂殺慶緒而并其衆欲遂
西畧恐根本未固乃留子朝義守相州而自引還更
國號大燕自稱應天皇帝上元二年思明以計敗光
弼兵於北圻王師棄河陽京師震恐益兵屯陝州思
明遂西使朝義爲先鋒朝義攻陝敗退壁永寧思明
大怒曰朝義怯不能成我事又曰朝下陝夕斬是賊
朝義懼駭悅等共說朝義召曹將軍同計大事悅遂

縊死思明朝義卽位以李懷仙爲幽州節度朝義與
官軍戰敗謀奔兩蕃懷仙招之止幽州自縊死懷仙
斬朝義首傳長安父子僭號凡四年

○李希烈

李希烈遼西人初從李忠臣戰河北有功忠臣貪殘
好色悉以軍政委其節度副使張惠光惠光挾勢暴
橫其子爲牙將暴橫又甚於父希烈因衆心怨怒遂
殺惠光父子而逐忠臣代宗乃以希烈爲蔡州刺史
淮西留後以永平節度使李勉兼汴州刺史

州希烈於是帥所部兵三萬徙鎮許州而遣所親詣李納與謀共襲汴又密與朱滔等交通滔與王武俊田悅聞希烈軍勢盛相與遣使勸希烈稱帝希烈遂自稱天下都元帥建中四年希烈遣其將李克誠襲陷汝州執別駕李元平又遣別將四出抄掠取尉氏圍鄭州官軍數爲所敗邏騎西至彭婆東都大震上以哥舒曜爲東都節度使將營兵萬餘人討希烈曜至郊城遇希烈前鋒將陳利貞擊破之希烈勢小沮曜翰之子也二月曜克汝州擒周晃進至襄城三月

江西節度使曹王臯敗希烈將韓霜露于黃梅斬之
拔黃州進拔蘄州及荆南節度使張伯儀與希烈兵
戰于安州大敗伯儀僅以身免上乃以神策軍使白
志貞爲京城召募使募禁兵以討希烈志貞請諸嘗
爲卽度觀察都團練使者不問存沒並勒其子弟帥
奴馬自備資裝從軍上又行稅間架除陌錢法於是
愁怨之聲盈于遠近八月希烈將兵三萬圖哥舒曜
於襄城詔李勉及神策將劉德信將兵救之劉德信
及宣武將唐漢臣與賊將李克誠戰敗於滬澗時李

勉奏希烈精兵皆在襄城許州空虛若襲許則襄城
圍自解方遣二將趣許未至數十里上又遣中使責
其違詔二將狼狽而返無復斥候故克誠伏兵邀之
殺傷大半漢臣奔大梁德信奔汝州希烈游兵剽掠
至伊闕汴軍由是不振襄城益危上方發涇原諸道
兵救襄城涇原兵仍挾朱泚爲亂上西走奉天襄城
遂陷曜奔東都希烈資性慘酷臨陣殺人血流滿前
而飲食自若以故人畏之爲盡死力於是乘襄城之
捷進攻李勉驅民運土木築壘道以攻城忿其未就

并人填之。謂之濕薪。遂陷大梁。時南方藩鎮各閉境。自守。惟曹王臯數遣使間道貢獻。李希烈攻逼汴鄭。江淮路絕。朝貢皆自宣饒荆襄趣武關。臯治郵驛。平道路。然後往來之使通行無阻。希烈既恃兵強。遂謀稱帝。號大楚。遣其將楊峯齎赦賜陳少游。及壽州刺史張建。建封執峯。徇軍腰斬於市。具以少游與希烈交通之狀聞上。悅。以建封爲濠壽廬三州都團練使。希烈乃以其將杜少誠爲淮南節度使。將步騎萬餘人。先取壽州。建封遣將守霍丘。秩。少誠不能過。

乃南寇蘄黃欲斷江路時上命包佶自督江淮財賦
泝江詣行在至蘄口遇賊兵曹王臯遣蘄州刺史伊
慎將兵七千拒戰大破之少誠脫身走包佶乃得前
希烈又以夏口上流使其驍將董侍募死士七千人
襲鄂州刺史使李兼偃旗臥鼓閉門以待之侍撤屋材
焚門兼帥士卒出戰大破之上以兼爲鄂岳沔都團
練使於是希烈東畏曹王臯西畏李兼不敢復有窺
江淮之志矣劉昌與曲環等又乘勝進攻汴州希烈
乃懼奔歸蔡州兵勢日蹙會有疾大將陳仙奇使醫

毒殺之始希烈入汴強取叅軍竇良之女女顧其父
曰慎無戚我能滅賊女因稱仙竒忠勇可用故希烈
任之而妻亦竇姓素與女歡洽及希烈有疾竇女乘
間謂仙竒妻曰賊雖強終必敗如可如何妻以告仙竒
仙竒始悟故用計殺之希烈已死子不肯發喪欲悉
誅諸將而自立適有獻桃者竇女請分遺諸將仙竒
妻因蠟帛丸雜果中出仙竒乃率兵入斬之函希烈
并妻子七首獻天子尸希烈於市帝以仙竒忠拜淮
西節度使

○朱泚

朱泚幽州人與弟滔並爲李懷仙部將朱希彩爲節度使頗委信泚大曆七年希彩爲其下所殺泚衆方外屯而滔主牙兵乃潛諗數十人大呼軍門曰帥非朱公莫可衆愕胎因共詣泚推知留後有詔卽拜盧龍節度留後三年泚求入朝自幽州首爲逆懷仙以來雖外臣順然不朝謁而泚倡諸鎮身入衛旣至見內殿賜賚甚厚泚之來滔攝後務稍稍剪落泚牙角泚自知爲所賣乃請留京師帝因授滔節度留後而

進泚太尉及滔合田悅以叛陰遣人與泚相聞河東馬燧獲其書帝召泚示之泚惶懼請死帝勉之曰千里不同謀卿何謝焉及李希烈圍哥舒曜於襄城詔涇原節度使姚令言督鎮兵五千東救曜過闕下京兆尹供軍衆怒供給粗糲不肯食羣噪曰吾等棄父母妻子前死敵乃食此庸能持身蹈白刃邪今瓊林大盈庫寶貲如山乃盡甲反旗而鼓劫令言西行殺使者薄丹鳳門帝倉惶出走夜至咸陽思桑道茂之言復扶趨奉天都虞候渾瑊以數十騎自夾城入北

丙哀兵欲擊賊聞乘輿出乃帥家人子弟俱奔奉天
赴難令言遂突入含元殿掠宜春苑入諸宮嚴兵自
固而未有所屬恐不能久以泚昔在涇原有恩且失
權日久乃相聚而謀曰太尉方囚錮若迎之則事可
濟令言遂率百餘騎見泚泚僞讓不肯許第留使者
飲以觀衆心是夜令言復率數百騎往見泚泚卽擁
徒衆向闕下舍前殿總六軍僭卽帝位國號大秦而
自將兵偪奉天時四鎮合兵萬人入援將至上召將
相議道所從入關播渾瑊曰漠谷道險狹恐爲賊所

邀不若自乾陵北過營於城東北雞子堆與城中犄角以分賊勢盧杞曰漠谷道近若爲賊所邀則城中出兵應之倘出乾陵恐驚陵寢城曰自賊圍城斬乾陵松柏以夜繼晝其驚多矣今城中危急救兵至者惟四鎮耳若得營據要地則泚易破也杞曰陛下行師豈比逆賊若令四鎮兵過是自驚陵寢不可上乃聽杞兵自漠谷進果爲賊所邀是夕四鎮軍潰退保邠州泚閱其輜重於城下從官相視失色初上至奉天詔徵近道兵入援有言朱泚爲亂兵所立欲來攻

城者盧杞切齒言曰朱泚忠貞羣臣莫及臣以臣
口保其不反上信之至泚僭位報聞盧杞曰志貞又
言於上曰臣觀朱泚心迹必不爲逆願擇大臣入京
城宣慰以察之上以問從臣皆莫敢行金吾將軍吳
淑獨請行上悅之淑退而告人曰食其祿而違其難
何以爲臣吾非不知往而必死但恨舉朝無蹈難之
臣耳遂奉詔詣泚泚陽爲受命館淑於客省尋殺之
及泚圍奉天帝卒不詰問杞

○王陵殺母逆賊

王陵沛人也。姓爲縣豪。高祖微時，兄事陵。及高祖起沛，入咸陽，陵亦聚黨數千人，居南陽，不肯從沛公。及漢王之還，擊項籍，陵廼以兵屬漢。項羽取陵母，置軍中。陵使至，則東鄉坐。陵母欲以招陵。陵母旣私送使者，泣曰：「願爲老妾語陵，善事漢王。漢王長者，毋以老妾故持二心。」妾以死送使者，遂伏劍而死。項王怒烹陵母。陵卒從漢王定天下，封安國侯。陵爲人少文，任氣好直言。爲右丞相。二歲，惠帝崩，高后欲立諸呂爲主，王問陵。陵不可。於是呂太后欲廢陵，廼陽遷陵爲帝。

太傅竇奪之相權陵怒謝病免杜明竟不朝請十年而薨

○趙苞啖名客殺母

趙苞字威豪甘陵東武城人從兄忠爲中常侍苞深耻其門族有宦官名勢絕不與忠交通初仕州郡舉孝廉再遷廣陵令視事三年政教清明郡表其狀遷遼西太守到官明年遣使迎母及其妻子道經柳城值鮮卑萬餘入塞寇鈔苞母及妻子皆爲所刼載以擊郡苞率兵二萬與賊戰賊出母示苞苞悲號告母

曰爲子無狀欲以微祿奉養朝夕不圖爲母作禍昔
爲母子今爲王臣義不得顧私恩毀忠節母遙謂苞
曰威豪人各有命不得相顧且王陵母對漢使伏劍
以固陵爾其勉之苞卽時進戰賊悉摧破母妻皆爲
所害

○溫嶠殺母

溫嶠字太真太原人嶠風儀秀整善談論見者皆愛
之平北大將軍劉琨請嶠爲參軍將兵討石勒有功
屬二都傾覆元帝初鎮江右琨乃以嶠爲左長史

言華夷奉表勸進嶠既至引其陳琨忠誠曰臣謹
復無主天人係望辭旨慷慨與朝屬目帝器而
除散騎侍郎初嶠欲將命其母崔氏固止之嶠絕裾
而行至是聞母亡乃苦請北歸詔不許嶠乃受命後
歷驃騎王導長史遷太子中庶子太子卽位嶠拜侍
中轉中書令嶠有棟梁之任帝親而倚之甚爲王敦
所忌敦因請嶠爲左司馬敦阻兵不朝多行陵縱嶠
知其不可諫乃謬爲恭敬綜其行事干說密謀以附
之又深結錢鳳爲之聲譽母曰錢世儀精神滿腹嶠

素有知人之稱。鳳聞而悅。亦與嶠深相結。會丹陽尹缺。嶠說敦曰。京尹輦轂喉舌。公宜自選其人。敦問誰可。嶠曰。錢鳳可。鳳亦薦嶠。嶠偽辭之。敦不聽。遂表嶠補丹陽尹。嶠懼。錢鳳或豫爲敦謀。因敦餞別。嶠起行。酒至鳳前。鳳未卽飲。嶠偽醉。以手版擊鳳。墜憤作色曰。錢鳳何人。溫太真行酒。而取不飲耶。敦以爲醉。兩釋之。臨去。言別。涕泗橫流。出閤復入。如是再四。然後卽路。及發。鳳入說敦曰。嶠於朝廷密。而與庾亮深交。恐未可信。敦曰。太真昨醉。小加聲色。便相讒貳乎。

至具奏敦逆謀敦聞與導書曰太真別來幾日
如此事乃表誅嶠又募生得嶠者當自拔其舌及王
含錢鳳奄至都下嶠燒朱雀桁以挫其鋒賊不得渡
嶠遂率衆與賊夾水而戰先擊王含敗之復督劉遐
追錢鳳於江寧事平封建寧縣開國公明帝疾篤嶠
與王導郗鑒庾亮陸曄下壺等同受顧命咸和初爲
江州刺史鎮武昌嶠聞蘇峻之徵慮必有變求還朝
以備不虞不聽未幾蘇峻果反嶠屯潯陽遣督護王
愼期西陽太守鄧嶽鄱陽內史紀瞻等率州師來赴

難復遣王愆期等往要陶侃侃恨不受顧命不肯出
兵嶠乃遣使告侃曰仁公且守僕宜先下嶠部將毛
寶謂嶠曰凡舉大事當與天下共之假令可疑猶當
外示不覺况自作疑耶速宜追改務期同發也嶠意
悟卽追使改書侃乃遣督護龔登率兵詣嶠嶠於是
列上尚書陳峻罪狀有衆七千洒泣登舟移告四方
征鎮時陶侃雖許自下而未發復遣追其督護龔登
以還嶠重與侃書曰大軍有進無退宜增而不宜減
近已移檄遠近言於盟府剋後月半大舉仁公今召

軍還疑惑遠近成敗之由將在於此夫僕與仁公並受方嶽之任安危休戚理旣同之且頃者相顧綢繆情深義重一旦有急亦望仁公悉衆見救况當社稷之難乎念僕偏當一州假令此州不守約峻樹置官長於此荆楚西逼強胡東接逆賊將來之危乃當甚於此州也以大義言之則社稷顛覆主辱臣死公進當爲大晉之忠臣參桓文之義舉開國承家銘之天府退當以慈父雪愛子之痛今約峻凶逆無道囚制人士裸其五形骨肉生離痛感天地人心齊一咸願

切齒今日進討。若以石投卵耳。今出軍既緩。復召兵還。人心乖離。是爲敗於幾成也。願深察所陳。以副三軍之望。峻時殺侃子瞻。故嶠激厲之。侃遂率所統與嶠同入。赴難。戎卒六萬。旌旗七百餘里。直指石頭。時祖約據歷陽。與峻爲首尾。見嶠等軍盛。謂其黨曰。吾本知嶠能爲四公子之事也。及聞嶠至。峻乃遷帝石頭。是時義軍屢戰失利。軍食亦盡。陶侃怒曰。使君前云不憂無將士。惟得老僕爲主。今數戰皆北。良將安在。荊州接胡蜀二虜。倉廩當備不虞。若復無食。僕便

西歸矣。嶠曰：不然。自古成監師克在和，光武之濟，且陽曹公之拔官渡，以寡敵衆，仗義故也。峻勇而無謀，今挑之戰，可一鼓而擒。奈何捨垂立之功，設進退之計乎？且天子幽逼，社稷危殆，四海臣子，肝腦塗地。今之事勢，義無旋踵。公若違衆獨還，人心必沮沮，衆敗事。義旗將迴指於公矣。侃不能對。嶠於是創建行廟，廣設壇塲，告皇天后土祖宗之靈，親讀祝文，聲氣激揚。涕覆面，三軍莫能仰視。其日，侃督水軍向石頭，庾亮與嶠等率精勇一萬，從白石挑戰。峻時方勞，將

士因醉突陳馬躓爲侃將所斬峻弟逸及于碩嬰城
自固嶠乃立行臺布告天下凡故吏二千石臺郎御
史以下皆令赴臺於是至者雲集遂破賊石頭而滅
之嶠加散騎常侍封始安郡公朝議將留嶠輔政嶠
以導先帝所任固辭還藩至牛渚磯水深不測有云
其下多怪物嶠燬犀角照之須臾見水族覆火奇形
異狀或乘馬車著赤衣者嶠是夜夢神謂曰與君幽
明隔別何意相照也嶠意甚惡因齒疾至鎮未旬而
卒時年四十三江州士庶聞之莫不垂泣于放之嗣

爵以貧求爲交州朝廷許之王述與會稽王彪之放
之溫嶠之子宜見優異而授之嶺外竊用愕然時竟
不納放之旣至南海甚有威惠將征林邑交趾太守
杜實別駕阮朗不從放之以其沮衆誅之勒兵而進
遂破林邑而還卒于官

○奸賊

李林甫

林甫唐宗室時武惠妃有寵子壽王尤愛林甫因中
人白妃願護壽王爲萬歲計妃德之侍中裴光庭夫
人武三思女也嘗私林甫而高力士本出三思家及
光庭卒武氏請力士以林甫代爲相力士未敢發而
帝因蕭嵩言自用韓休方具詔武氏撻語林甫使爲
休請休旣相重德林甫而與嵩有隙乃薦林甫有宰
相木妃陰助之卽拜黃門侍郎尋爲兵部尚書同中

書門下三品始九齡繇文學進守正持重而林甫特以便佞故得大任每嫉九齡陰害之會帝欲進朔方節度使牛仙客實封九齡持不可林甫爲言天子用人何不可者帝聞而善之由是疏薄九齡與裴耀卿俱罷而專任林甫相仙客初三相就位二相磬折趨而入獨林甫在中軒驚無少讓喜津津觀者竊言一鵬挾兩兔矣少選傳詔出耀卿九齡俱罷林甫嘻而笑曰尚左右丞相耶於是林甫進兼中書令帝卒用其言殺三子天下寃之及帝將立太子林甫探帝意

數稱道壽王而帝意自屬忠王太子既定林甫恨其
不行恐及禍乃陽善韋堅堅太子妃兄也故使堅任
要職欲覆其家以搖東宮及構堅獄而太子絕妃自
明林甫計黜太子杜良娣其父有隣與婿柳勣不相
中勣浮險欲助林甫乃上有隣變事捕送詔獄賜死
逮引裴敦復李邕等皆林甫素忌惡者株連殺之太
子又出良娣爲庶人得無事未幾林甫擣濟陽別駕
魏林使誣河西節度使王忠嗣嘗自言我幼養宮中
與忠王相愛欲擁兵佐太子帝不信而斥忠嗣林甫

又白帝曰太子宜知謀帝曰吾兒在內安得與外人相聞此妄爾林甫一日從容言曰古者立儲君必先賢德非有大勲力於宗社則莫若元子帝曰慶王徃年獵爲豹傷面甚林甫對曰破面不愈於破國乎帝頗惑之曰朕徐思之然太子以謹孝聞內外無甚言故飛語終不得入林甫性陰賊忍誅殺同時若九齡李適之皆遭逐殺楊慎矜張瑄等緣坐數百人相繼誅戮以王鉷吉溫羅希奭爲爪牙興大獄衣冠累息適之子雪嘗盛具召賓客畏林甫終無敢徃者林甫

有堂如偃月號月堂欲排構大臣卽居之子岫爲將
作監嘗從游後園見螯重者跪而涕曰大人居位冬
枳棘滿前一旦禍至欲比若人得乎林甫不樂曰勢
已然可奈何時帝詔天下士有一藝者得詣闕就遷
林甫恐士對詔斥已卽建言士皆草茅未知禁忌徒
以狂言亂聖聽請悉委尚書省試問竟無一中者林
甫因賀上以爲野無留才故事宰相皆元功出入駟
從簡寡士庶不甚引避林甫自見結怨者衆恐刺客
竊發出入駟騎先驅百步金吾爲清道公卿辟易趨

走所居重關復壁絡版甃石一夕再徙家人亦莫知也帝或不朝羣司百官悉走其門左相陳希烈雖坐府卒無一人謁者居相位凡十九年固寵市權蔽欺天子諫官無敢正言補闕杜璡再上書言政事卽斥爲下却令因以語動衆曰明主在上羣臣將順不暇君等獨不見立仗馬乎終日無聲而飫三品芻豆一鳴則黜之矣由是諫爭路絕貞觀以來任蕃將者如阿史那杜爾契苾何力皆以忠力奮然猶不爲上將皆大臣揔制之開元中大臣若薛納郭元振張嘉貞

王俊張說蕭嵩等皆自節度使入相天子林甫欲挫其本以久已權卽說帝曰以陛下雄材國家富強而夷狄未滅者繇文吏爲將憚矢石不肯先身也不如用蕃將彼生而雄傑養馬上長行陣若陛下感而用之夷狄不足圖矣帝然之因以安思順代林甫領節度而擢安祿山高仙芝哥舒翰等專爲大將故祿山得專三道勁兵十四年不徙卒稱兵蕩覆天下林甫爲之也李適之旣與林甫有隙適之又領兵部尚書林甫乃使人發兵部銓曹姦利事收吏六十餘人付

京兆尹蕭炆炆使法曹吉溫鞠之溫入院先於後廳
取二重囚訊問或杖或壓號呼之聲所不忍聞兵部
吏素聞吉溫慘酷及引入皆自誣服頃刻獄成而囚
無榜掠追之遂得罪後林甫求治獄吏於炆炆薦溫
林甫大喜溫語人曰若遇知己南山白額虎不足縛
也時又有羅希夷爲吏深刻林甫引之自御史臺主
簿遷殿中侍御二人皆隨林甫所欲深淺鍛鍊無能
自脫者時人謂之羅鉗吉溫適之貶宜春羅希夷自
青州如嶺南所過殺遷謫者無數牒至宜春適之仰

藥自殺適之子雪迎父喪至東林甫使人誣告亦杖死於河南李邕裴敦復皆杖死邕才藝出衆盧藏用嘗語之曰君如干將莫邪難與爭鋒然終虞缺折

○盧杞

杞祖懷慎也父奕死安祿山之難杞有口才體陋甚鬼貌藍色不耻惡衣菲食人咸謂有祖父風節籍蔭爲遷虢州刺史奏言虢有官豕三千爲民患德宗命徙之沙苑杞曰同州亦陛下百姓臣請食之便帝曰

守號而憂他州宰相材也。俄召爲御史中丞，論奏合
帝意。踰年，遷大夫，不閱旬，擢門下侍郎、同平章事。楊
炎與杞俱輔政，炎鄙杞才下，未半歲，杞譖罷炎，炎卒。
逐死杞惡太子太師顏真卿欲出之，會李希烈逼東
都，上問計於盧杞，對曰：「希烈年少驕將，恃功驕慢，誠
得儒雅重臣奉宣聖澤，爲陳逆順禍福，希烈必革心
悔過，可不勞軍旅而服。」顏真卿三朝舊臣，忠直剛決，
名重海內，人所信服，上以爲然，卽令宣慰其軍，卒爲
希烈賊害。故宰相李揆有雅望，杞畏其復用，遣爲吐

蕃會盟使遂卒于行。是時兵屯河南，財用日急，度支
條軍所仰給，月費緡百餘萬。杞乃以戶部侍郎趙贊
判度支，建言商賈儲錢千萬，聽自業，過千萬者，貸其
贏以濟軍。軍罷，約取償于官。帝許之。長安爲閉肆，民
心愁忿，贊術大窮。於是間架除陌之稅行矣。所謂間
架錢者，其法屋三架爲間，上稅間二千，中千，下五百。
吏執籌入第室計之，隱不盡二架，抵罪告者以錢五
萬畀之。所謂除陌錢者，公私貿易舊法千錢筭二十
請加五十。主僧注所售，入其筭有司，其自相市爲私

籍自言隱不盡率千錢沒二萬告者以萬錢畀之由是主僧得操其私以爲姦其倡和造作以召怨階亂皆杞爲之後帝出奉天杞從上卒迫走出百僚諸王鮮有知者李懷光自河北還平奉天之難杞懼其入朝有所閑說譎帝詔懷光無朝京師進屯便橋乘銳破賊以致懷光怏怏自疑逐謀反暴言杞等罪惡士議誼沸皆指目杞帝不得已貶杞新州司馬然尤念之乃因興元赦令徙杞爲吉州長史杞喜曰上必復用我矣貞元元年詔拜杞饒州刺史給事中袁高不

肯草詔、乃改爲澧州、別駕、遂死澧州。初、尚父郭子儀有病、百官造省、不屏姬侍、及杞至、卽屏去、隱几而待。家人恠、問其故、子儀曰、彼外陋、內險、左右見之、必笑、使得權、吾族無類矣。

○秦檜湯思退附

秦檜、江寧人。登政和五年第二。帝北遷、金以檜及孫傳張叔夜、何臬司馬朴從至燕山、會金主吳乞買、以檜賜其弟撻懶、撻懶攻山陽、檜遂與妻王氏及婢僕一家自軍中取漣水、軍水砦、航海歸、行在入見、拜禮

部尚書檜之歸也。自言殺金人監已者奪舟而來朝。士謂檜與梟傳朴同拘而檜獨歸。又自燕至楚三千八百里踰河越海。豈無譏訶之者。安得殺監而南就令捷。懶縱之亦必質親屬。安得與王氏偕行。蓋檜在金庭首倡和議。故捷懶縱之使歸也。其通虜明甚。紹興元年除參知政事。檜揚言曰。我有二策。可以聳動天下。或問何以不發。檜曰。今非相不可行也。八月拜右僕射。九月呂頤浩再相。檜同秉政。檜風其黨建言。周宣王內修外攘。故能中興。今二相並任。宜分內外。

顧浩遂建都督府於鎮江高宗曰顧浩專治軍旅、
專理庶務如種蠶之分職可也二年顧浩自江上還
謀逐檜檜罷前日上謂直學士綦密禮曰檜欲以
河北人還金中原人還劉豫若南人歸南北人歸北
朕北人將安歸乎檜又言爲相數月可以聳動天下
今未有也密禮卽以上意載訓辭播告中外然後知
上亦疑檜之姦矣五年上駐蹕平江復召檜赴行在
用右相張浚薦也卽日授檜樞密使會浚求去帝問
誰可代卿者且曰秦檜何如浚曰與之共事始知其

閻帝曰然則用趙鼎故鼎復相浚遂謫永州始浚鼎甚相得浚先達力引鼎浚又嘗盛稱檜於鼎鼎曰此人得志吾人無所措手足矣浚不以爲然故引檜共政至是檜聞浚言深憾浚反謂鼎曰上欲召公而張相遲留蓋因以激怒鼎使擠浚也鼎素惡檜至是反信檜卒爲檜所傾云八年拜檜右僕射吏部侍郎晏敦復憂之曰姦人相矣金使來議和與王倫偕至檜與宰執共入見檜獨留身言臣僚畏首尾不足與斷大事若陛下決欲講和乞顙與臣議帝曰朕獨委卿

檜曰臣恐未便望陛下更思三日既三日檜復留身
奏事帝意欲和決矣檜猶以爲未也曰臣恐別有未
便欲望陛下更思三日帝曰然又三日檜復留身奏
事如初知上意不移乃出文字乞決和議勿許羣臣
預之鼎遂力求去出知紹興府鼎既去檜獨專國決
意議和中朝士以議和論不合者咸相繼去位矣檜
方挾金人自重至是欲上行屈已之禮議撤淮南守
備奪諸將兵權時諸將所向奏捷而檜力主班師九
月詔岳飛還行在楊沂中還鎮江劉光世還池州劉

錡還太平、飛軍聞詔、旗靡輒亂、飛口呿不能合、於是
淮寧蔡鄭復爲金人有、檜盡收諸將兵、詔給事中范
同令諸將入對、岳飛至入對、口如今文臣不愛錢、武
臣不惜命、欲了卽了耳、檜領之、於是世忠俊並爲樞
密使、飛爲副使、三人累表辭、謝檜與上約、荅詔視常
期、率遲留一二日、凡諸禮例恩賜各自倍、檜別下詔
命三大帥軍中列校使各統所部自爲一軍、更其銜
曰統制、御前軍馬凡其所統、陞黜賞罰得專達之、諸
校喜于自便、莫不欣然受命、明日三大帥受元樞之

制以出其所部皆已散去導從盡是密院之人三
始知兵柄見奪洪皓歸自金致金酋室然寄問之語
檜聞之深以爲憾令李文會論之皓遂貶英州後檜
趨朝殿司小校施全刺檜不中檜引問之曰你莫心
風否全曰我不是心風舉朝上下都要去殺番人你
獨不肯殺故我便要殺你自是檜出列大兵長挺以
自衛自檜擅政屏塞人言故一時獻言者非誦檜功
德則許人陰私以取寵求媚中有一二恐觸忌諱只
論銷金鋪翠乞禁鹿胎冠子之類以塞責至有請檜

乘金根車置益國官屬并議九錫者。檜聞之安然以
太廟靈芝繪爲華旗。檜兩據相位。凡十九年。劫制君
父。包藏禍心。倡和誤國。一時忠臣良將。誅鋤盡。凡
論人章疏皆檜。自操筆以授言者。識之者曰。此老秦
筆也。察事之卒。布滿京城。小涉譏議。卽捕治之。又陰
結內侍及醫師。伺上動靜。郡國大事。只申臺省。主上
不聞也。嘗病告一二日。執政獨對。不敢他語。惟盛稱
秦檜勲業。明日檜入。忽問曰。昨日奏事甚久。執政皇
恐曰。某惟誦太師勲德語。終卽退。實無他言。檜嘻笑。

曰甚荷蓋已喉言事官上章矣執政南歸閣彈劾別
本已到其伎刻如此自其獨相至死之日易執政二
十八人皆柔佞易制之徒言官聽檜彈擊者輒以政
府與之故由中丞諫議而陞者凡十二人然甫入卽
出或閱月或半年卽罷去惟王次翁閱四年以金人
敗盟之初持不易相之論檜德之深也朱子曰秦檜
死高宗告楊郡王云朕今日始免膝裋中帶匕首乃
知高宗平日常防檜但到這田地匕首也如何使得
高宗初見檜能擔當和議遂以國柄付之被他入手

了高宗更收不上高宗所惡之人檜引而用之高宗亦無如之何高宗所欲用之人檜自擯去之舉朝無非檜之人高宗更動不得了

李生曰使秦檜不死高宗有寒心矣使檜幸而永年高宗不壽檜不但欲受九錫已也檜之所以竭力事金者異他日如契丹立石敬瑭爲晉帝故事耳其設心未嘗不欲安坐而享張邦昌劉豫之貴也趙鼎諸人不學無術不能知人相幾盡在其術中而不悟悲夫

湯思退處州人秦檜當國惡直醜正必不與已違異者始久於用時思退名位日進檜病篤招董德玄及思退至臥內贈以黃金千兩德玄慮其以我爲自外不敢辭思退慮其以我期他死不敢受高宗聞之以思退不受檜金非檜黨也信之拜尚書左僕射侍御史陳俊卿論其挾詐傾邪專附秦檜父子乃罷隆興元年符離師潰孝宗召思退復相之時金來索海泗唐鄧四郡上不許思退遽奏以吏部侍郎王之望爲通問使許割棄四郡與金復密令孫造諭金以重兵

魯和上聞有敵兵命思退督江淮軍思退辭不行言者因極論思退急和徹備之罪遂罷相以憂悸死